

L I G J
Nr.8546, datë 5.11.1999

**PËR DISA SHTESA DHE NDRYSHIME NË LIGJIN NR.8436, DATË 28.12.1998 “PËR
ORGANIZIMIN E PUSHTETIT GJYQËSOR NË REPUBLIKËN E SHQIPËRISË”**

Në mbështetje të neneve 81 dhe 83 pika 1 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.8436, datë 28.12.1998 “Për organizimin e pushtetit gjyqësor në Republikën e Shqipërisë”, bëhen këto shtesa dhe ndryshime:

Neni 1

Në nenin 5, fjala “ushtrohet” zëvendësohet me fjalën “përbëhet”.

Neni 2

Në nenin 14, paragrafi i fundit shfuqizohet.

Neni 3

Pas nenit 14 shtohen nenet 14/a dhe 14/b me këtë përmbajtje:

“Neni 14/a

1. Shërbimet ndihmëse në gjykatë drejtohen nga Kancelari dhe përmbushen nga sekretaria gjyqësore, degët dhe sektorët e administratës, të ekonomisë, financës, informatizimit, regjistrimit dhe ruajtjes së dokumenteve.

2. Përcaktimi i sektorëve dhe organikave për çdo gjykatë bëhet me urdhër të Ministrit të Drejtësisë.”

Neni 14/b

1. Kancelari emërohet dhe shkarkohet nga Ministri i Drejtësisë.
2. Kancelar emërohet personi i cili është diplomuar jurist dhe që ka një përvojë pune në këtë profesion prej jo më pak se pesë vjet.

3. Emërimi dhe shkarkimi i sekretarëve gjyqësore dhe i personelit administrativo-teknik të shërbimeve të gjykatës bëhet nga Kryetari i Gjykatës, me propozim të Kancelarit.

4. Kryetari i degës së buxhetit në gjykatë emërohet dhe shkarkohet nga Ministri i Drejtësisë.”

Neni 4

- Në nenin 17, pas paragrafit të parë shtohet një paragraf me këtë përmbajtje:

“Inspektorët emërohen dhe shkarkohen nga Presidenti i Republikës, me propozim të Ministrit të Drejtësisë.”

- Po në këtë nen, paragrafi i dytë riformulohet:

“Inspektorët kanë për detyrë të inspektojnë gjykatat e shkallës së parë dhe të apelit, të verifikojnë ankesat e shtetasve dhe të subjekteve të tjera për gjyqtarët, të kontrollojnë organizimin dhe

punën e shërbimeve gjyqësore, të bëjnë evidentimin e aftësive profesionale të gjyqtarëve, në kuptim të nenit 45 të këtij ligji, ngarkesën në punë dhe në tërësi efikasitetin e gjykatave.”

Neni 5

Në nenin 20, paragrafi i parë ndryshohet si vijon:

“Mund të emërohen si gjyqtarë edhe personat që nuk kanë përfunduar Shkollën e Magjistraturës, në qoftë se përmbushin kriteret e nenit 19 të këtij ligji dhe njërin prej kriterëve të mëposhtme:”

Neni 6

Pas pikës 3 të nenit 20 shtohet pika 3/a me këtë përmbajtje:

“Për emërimin si gjyqtarë të ndihmësgjyqtarëve që punojnë aktualisht nëpër gjykatat e shkallës së parë, afati i përcaktuar në pikën 3 të këtij neni nuk është kriter i detyrueshëm.”

Neni 7

Pas nenit 20 shtohet neni 20/a me këtë përmbajtje:

“1. Me propozim të Këshillit të Lartë të Drejtësisë, Presidenti i Republikës emëron gjyqtarë personat që kanë mbaruar vitin e dytë të Shkollës së Magjistraturës për të kryer stazhin profesional të parashikuar në ligjin nr.8136, datë 31.7.1996 “Për shkollën e Magjistraturës së Republikës të Shqipërisë”, në gjykatat që kanë kushtet më të mira për organizimin e këtij stazhi.

2. Kriteret e përcaktuara në pikat 3 dhe 5 të nenit 19 të këtij ligji nuk përbëjnë pengesë vetëm për emërimin e personave të përmendur në pikën 1 të këtij neni.

3. Pas përfundimit të stazhit profesional, Presidenti i Republikës dekreton caktimin e tyre në gjykatat e rretheve gjyqësore, sipas nevojave që ato kanë.

Neni 8

Në nenin 22, paragrafi i parë ndryshohet si vijon:

“Kandidatët për gjyqtarë emërohen në detyrë nga Presidenti i Republikës me propozim të Këshillit të Lartë të drejtësisë, mbi bazën e konkurrencës në këtë të fundit.”

Neni 9

Neni 24 ndryshohet si vijon:

“1. Gjyqtarët e gjykatës së apelit emërohen nga Presidenti i Republikës me propozim të Këshillit të Lartë të Drejtësisë, mbi bazën e konkurrencës, pasi të kenë punuar jo më pak se pesë vjet në gjykatat e shkallës së parë dhe të jenë dalluar për aftësi profesionale dhe cilësi të larta etiko-morale.

2. Kryetarët dhe zëvendëskryetarët e gjykatave të shkallës së parë dhe të apelit emërohen nga Presidenti i Republikës me propozim të Këshillit të Lartë të Drejtësisë.”

Neni 10

Në fund të nenit 28 shtohet një paragraf me këtë përmbajtje:

“Në raste të veçanta Këshilli i Lartë i Drejtësisë, me propozimin e Ministrit të Drejtësisë, mund të ngarkojë një gjyqtar që të kryejë detyrën e kryetarit ose të zëvendëskryetarit të gjykatës së shkallës së parë ose të apelit, për një periudhë jo më shumë se tre muaj.”

Neni 11

Neni 33 ndryshohet si vijon:

“Gjatë gjykimit të çështjeve gjyqtarët, prokurorët dhe avokatët duhet të respektojnë solemnitetin e gjykimit dhe të mbajnë veshje të posaçme. Rregullat në lidhje me solemnitetin e

gjkimit dhe veshjen përcaktohen me urdhër të Ministrit të Drejtësisë, pasi të ketë marrë mendimin e Kryetarit të Gjykatës së Lartë, të Prokurorit të Përgjithshëm dhe Dhomës Kombëtare të Avokatëve.”

Neni 12

- Në nenin 42, pika 3 shfuqizohet.
- Po në këtë nen, pika 5 riformulohet:
“5.Transferimin në një gjykatë tjetër të të njëjtit nivel ose të një niveli më të ulët.”

Neni 13

Ky ligj hyn në fuqi menjëherë.

Shpallur me dekretin nr.2479, datë 8.11.1999 të Presidentit të Republikës së Shqipërisë, Rexhep Meidani